

आपां बंय्या का ई बण ज्यावां जंय्या की आपणी सोच  
होवै, ई क्ले ई बात को ध्यान राखो कि थहे के सोचो हो।

स्वामी विवेकानन्द



## सेखावाटी तिमाई पतरिका

आपणी सेखावाटी, आपणी बोली

जनवरी सून मारच-2018



  
**nirmaan**  
empowering communities

संपादक

निरमाण सोसायटी-नोलगड

अग्यानी मिनख एक सांड की जंय्या है, ग्यान म नै होकी अकार म बढे है। - गौतम बुद्ध

## ओळखाण

आपणै राजस्तान कै मांय बोळी सारी बोलियां बोली जा है। बिमै एक सेखावाटी बोली बी बोली जा है। आ बोली राजस्तान कै चुरु, झूंझनू अर सीकर जिला मांय बोली जा है। ई बोली नै आपणा एरिया मांय “सेखावाटी बोली” को नांव दियो गयो है। जखी आपणा घरका, गांमका अर ठिकाणा कै लोगां कै सागै बोला हां, पण दो-च्यार बरस सुं ई बोली नै भूलता जार्या हां। ईक्ले आपणी बोली नै बणाया राखबा कले कई तरियां की पोथियां बणाई है। जखी म एक “सेखावाटी तिमाई पतरिका” बणाई है। बिमै आपणी बोली म बोली जाबाळी काहणियां, कहबत, सुबिचार, भजन, धमाल, लोकगीत, पाहूळी घरेलू नुसखा अर सिरकार की योजना अ सगळी चीज्यां लिखी गई है। आनै लिखबा को म्हारो ओ मकसद है कि आपणी मान-मरयादा अर धारा नै बणाया राखबा कले अर आपणी बोली पीडी दर पीडी बणी रह सकै। आपणी बोली को अबताई कोई कन बी लिखेडो रूप कोनी। राजस्तान मांय सैसूं पेली आपणी बोली को लिखेडो रूप देबा को काम निरमाण सोसायटी कै दुआरा कर्यो जार्यो है। पण थहारै लोगां कै सारा बिना ओ काम अधूरो है।



## सेखावाटी धमाल

### कद आवैलो

एहे...कद आवैलो भोजाईये राणो काजटियो ए [टेर]  
एहे...चालो ए भोजाईये आपां पीपळ पूजण चालां ए...  
बठे-बठे आवै राणो काजटियो ए कद आवैलो...[1] टेर  
एहे...चालो ए भोजाईये आपां सोनिडै घर चालां ए...  
हो...मादळियो घड़ावै राणो काजटियो कद आवैलो... [2]  
टेर  
एहे...चालो ए भोजाईये आपां पिणघट ऊपर चालां ए...  
घड़लो उठावै राणो काजटियो ए कद आवैलो...[3] टेर  
एहे...चालो ए भोजाईये आपां माळिडै घर चालां ए...  
ओ फुलड़ा मुलावै राणो काजटियो ए कद आवैलो...[4]  
टेर

## सेखावाटी भजन

### सतगुरु कर मेरा भाई

विघ्न हरण मंगल करण ओर होत बुधी परकास।  
लेत नांव गणेश को तो हरे करोड़ अपराध॥  
बरमा, बिसणू अर लकसमी तो महेस गुणो की खान।  
सरसवति मया मनाय कै मै करूं हरि गुणगान॥  
बिना गुरु बिना ना कोई संगी  
अंत समय कै मांय रै मन मेरा सतगुरु कर मेरा भाई...[टेर]  
जद घणो कस्ट पडैगो तैरै रै निरगुण आडो आई  
मात-पिता सुत तिरिया रै बान्धू मुंडो रै लेसी छिपाई [1]  
टेर  
धन ओर दोलत मेल-माळिया रै सबी धर्या रह ज्याई  
जमका दूत पकड़ ले ज्यासी रै जूता खातो ज्याई [2] टेर  
राज तेज की चलै नाही मायती देवांगा चलै बठे नाही  
दूर खड्या गुरुदेव देखिया भाग गया जमराई [3] टेर  
गुरु मिलै तो बन्दन छुड़ा दे निरभय कर दे सोई  
अचल राम तज सकल आसरो गुरु सरण सुख होई [4] टेर

## सेखावाटी कहबत

1. अंबर कै थेगळी कोनी लागै।

अर्थ:- असम्भव काम होना।

2. अ ल्योजी! घोड़ा का पारखी, पूछ ऊंची कर दांत देखै।

अर्थ:- निपट अनाड़ी और अनभिज्ञ व्यक्ति जब व्यर्थ में किसी विषय में दखल अंदाजी करता है, तब व्यंग्य में इस कहावत का प्रयोग किया जाता है।

## सेखावाटी पाहूळी

1. भूरती भैस टीबा पै ब्याई, सो सींगाळी पाडी ल्याई,  
जामताई मारण नै आई - भरूंट

2. हरी घणी लाम्बी घणी सुओ जस्यो रंग, ग्यारा देवर छोड  
नै चाली जेठ कै संग - सांगरी

बणाबाळा:-

कमलेश कुमार अर विक्रम सिंह

मदत करबाळा:-

मुकेश कुमार योगी, रतन लाल योगी

अर कविता योगी

## जीवन लाम्बो होणा कै बजाय बडो (महान) होणो चाये। - बी. आर. अम्बेडकर

### देसी नुसखो

#### खांसी जुखाम को इलाज:-

1. एक चमची अदरख का रस मांय एक चोथाई सैद अर चुटकी भर हळदी मिला'र लेबा सूं खांसी म अराम आवै है।
2. एक चमची सैद मांय पीसेडी काळी मिरच मिला'र लेबा सूं खांसी मांय अराम आवै है अर खांसी तावळी ई दूर होज्या है।
3. एक बडी चमची अजवाण का पात को रस अर हळदी मिला'र गरम करल्यो। फेर बिनै सीळो होबा द्यो, सीळो होबा कै पाछै बिनै सैद मांय मिला'र लेबा सूं अराम मिलै है।

भुंदेड़ा चणा म काळी मिरच मिला'र खाबा सूं बी खांसी मांय अराम मिलै है। लमसम 100 ग्राम गुड़ मांय आदी चमची पीसेडी सूंठ अर एक चोथाई पीसेडी काळी मिरच मिला'र बानै च्यार हिस्सा म बांटल्यो। जिनै दिन म च्यार बर लेबा सूं खांसी अर जुखाम म अराम आवैगो।

#### हणमान जी को गीत

हणमत कैण चिणायो बालाजी थहारो देवरो

हणमत कैण दिराई गजनीम बाबै बजरंग जी रो बुंगेलो यद बुण्यो

हणमत राजा जी चिणायो बालाजी थहारो देवरो

हणमत सेवका दिराई गजनीम बाबै बजरंग जी रो बुंगेलो यद बुण्यो

हणमत असी ए खुसा म बालाजी थहारो देवरो

हणमत सगळी सैसंट म जगां जोत बाबै बजरंग जी रो बुंगेलो यद बुण्यो

हणमत कळी ए चूना रो बालाजी थहारो देवरो

हणमत अगड़ चनण रा किवाड़ बाबै बजरंग जी रो बुंगेलो यद बुण्यो

हणमत हात पसार्या बालाजी थहारा नावड़ा

हणमत भीड़ पड्या थहे हाजर होय बाबै बजरंग जी रो बुंगेलो यद बुण्यो

हणमत घी भर दीवल्लो बालाजी थहारै जोडुस्यो

हणमत लूळ-लूळ लेस्यां थहारी लोय बाबै बजरंग जी रो बुंगेलो यद बुण्यो

हणमत चढ नै चढावां बालाजी थहारै चूरमो

हणमत ओर चूट्याळा नाळेर बाबै बजरंग जी रो बुंगेलो यद बुण्यो

हणमत कोरो सो कळस्यो बालाजी थहारै जळ भयों

हणमत इमरस चळू ए कराय बाबै बजरंग जी रो बुंगेलो यद बुण्यो

हणमत कांटै कांट्याळी बालाजी थहारी खेजडी

हणमत धजा ए फरुकै असमान बाबै बजरंग जी रो बुंगेलो यद बुण्यो।

### सेखावाटी काहणी

#### बादस्या को सुपनो



एक ताकतवर अर न्याय चावण आळो बादस्या हो। बो घणी सारी राड़ जीत राखी ही। पण होळे-होळे खून-खराबा सै बिको मन भरबा लाग्यो। एक रात नै बिकै सुपना कै मांय एक देवता आयो अर बोल्यो बादस्या! मै थहारा सूं राजी हूं। ल्यो आ खड़ग, आ थहनै जग कै मांय जीत दिवावैगी। बादस्या हात जोड'र बोल्यो हे देव, मै थहारी ई किरपा सूं खुस हूं। पण ई खड़ग को मै के करस्यूं? मनै लड़ाई सै घिन होती जारी है। जणा देवता एक हात कै मांय मणी ले'र बोल्यो, आ नील मणी लेल्यो। ईकै चमतकार सै थहनै घणो सारो धन मिलैगो। ई बात पै बादस्या बोल्यो, 'थहे बडा दयालु हो।' थहारी मेरपै अत्ती किरपा है। परजा सै लगान म जखो धन मनै मिलसी, बिसूं देस को कामकाज चोखी तरियां चालज्या। ई बात पै देवता बोल्यो, 'बादस्या लागै थहनै जग की चीज्यां म थहारी रूची कोनी। थहे मेरै सागै सुरग म चालो।' बादस्या जुबाब दियो, 'सुरग कै सुख को मनै के करना है। मेरी प्यारी धरती सुरग सै के कम है?' देवता बोल्यो 'ठीक है, मै थहनै फूलां का किमी बीज देस्यूं। जठे बी खिंडास्यो, बठे ईंध्या की सोरम आळा फूल होवैगा कै बानै सुंगताई बेरी बी भायला बण ज्यासी।' ई बर बादस्या कै होटां पै खुसी आई। दोन्यूं हात आगै करकी फूलां का बीज ले लिया अर राजी हो'र बोल्यो, 'सच म मनै आंकी ई जरूत ही। परजा का मिनख मिलजुल की रहवै, ईसूं बडी बात ओर के हो सकै।' बादस्या को सुपनो टूट्यो। बिकी सारी आफत मिटगी। मिनखा की भलाई करनो ई बादस्या नै आपको लकस्य बणा लियो।

**सीख:-** काम नै सोच बिचार'र करनो चाये।

## नरेगा की ध्याड़ी

महात्मा गांधी रास्टीय गरामीण रोजगार योजना अधिनियम 2005 सायद ई दुनिया की सैसूं बडी काम आळी योजना है। ई योजना सूं कई कुणबा जखा गरीबी रेखा सूं नीचे जीर्या है या जखा कन काम-धंधो कोनी है बानै सिरकार दुआरा कम सूं कम 100 दिन को काम दियो जा है, जंय्या कै सलडक बणाणो, सिंचार को काम कराणो। आ योजना ई आस कै सागै दी जाय है जिसूं गरामीण कुणबा, ई तनखा सूं ओर बडिया सुविदा देखर आपकै गांमै ई बस्या रह, बजाय सैर कै।

### 1. समंदी बिभाग

केन्द्र सिरकार: गरामीण बिकास मंतरालय

राजस्तान सिरकार: राजस्तान गरामीण बिकास बिभाग

2. हक (Best source: supreme court order <http://sccommissioners.org/FoodSchemes/MGNREGA.html>)

भोत सारी जाणकारी लेबा क्ले बेबसायट नै खोलर देखो।

- हरेक गरामीण परिवार कै हरेक साल 100 दिन को काम (18 बरस सूं ऊपर को कोई बी मिनख) दियो जा है।

- 15 दिना कै मांय काम मिल ज्याणो चाये।

- काम बी बटे ई मिलणो चाये जठे फारम भरबाळो काम करतो होवै अर जे काम की जगां जखी घरां सूं 5 किलोमीटर सूं जादा है तो यातरा भतो मिलणो चाये।

- पेल्यां सूं तय करेडी कम सूं कम मजूरी को भुगतान पण हर दिन रिपिया 122/- को भुगतान देणो होवैगो। (सिरकारी कागज-पानड़ा देखणा क्ले बेबसायट नै खोलर देखो)

- बेंक या डाग खातो या खाली नगद दुआरा भुगतान जठे बेंक या डागघर कोनी होवै। (सिरकारी कागज-पानड़ा देखणा क्ले बेबसायट नै खोलर देखो)

- काम की टेम कै 14 दिना कै मांय बेंक या डाग खाता म मजूरी को भुगतान मिल ज्याणो चाये।

- 15 दिना कै मांय जे काम कोनी मिलतो होवै तो बिना काम को भतो दियो जाणो चाये। पेली 30 दिन क्ले 33 परतिसत अर बिकै पाछै कै दिना क्ले 50 परतिसत मिलणो चाये।

- काम करबाळी जगां पै - साफ पाणी, आपातकालीन निरोगी सेवा, टाबर की देखरेख की सुबिदा अर अराम करबा क्ले सेड की सुबिदा दी जा है।

- रिपिया 25000/- को हरजाणो बानै दियो ज्यागो जखा की नरेगा कै मांय काम करती बखत मोत हो ज्या या हमेसा क्ले लंगड़ो होज्या।

नरेगा कै मांय मजूरिया नै

- जनसिरी बीमा योजना जखी गरामीण लोगां क्ले जीवन बीमा को अर लंगड़ो होबा पै नफो दियो जाय है।

- रास्टीय निरोगा बीमा योजना बा सगळा मजूरिया क्ले जखा गेल की साल मांय कम सूं कम 15 दिना सूं जादा काम कर्यो है।

3. आवेदन का तरीका (सफलता को चानस 50 परतिसत, टेम की सीमा 06 म्हना)

- \* थहारी पंचायत कै मांय रोजगार कारड क्ले फारम भर द्यो।

- \* जे काम को कारड है तो काम क्ले फारम भरो।

- \* थहे बठे की पंचायत म जा सको हो या फारम ओनलायन भर सको हो।

- \* 15 दिना कै मांय काम मिल ज्या है।

4. दबाव (जे फारम भरबा कै पाछै सफलता कोनी मिलै)

(क) नरेगा सिकायत निपटारा केन्द्र सूं सीदा मेळ करो।

(ख) बडी कचेडी कै आयुक्त का सलाहकार सूं मेळ करो (आपां जखा नै जाणा हां)

डॉ.प्रदीप भार्गव

फोन:- 915322569214

ई-मेल:- [pradeep1412@rediffmail.com](mailto:pradeep1412@rediffmail.com).

डॉ. जिनी श्रीवास्तव

फोन:- 09414164512

ई-मेल:- [astha@gmail.com](mailto:astha@gmail.com).



## थहारा बिचार

ई पतरिका अर आपणी लिखेडी बोली कै बारे म थहारा के बिचार है। बै थहे म्हानै बतावो। थहार कन सेखावाटी बोली कै मांय कंय्या की बी लिखेडी कोई पोथी होवै बिमै आपणी बोली की काहणिया, कहबत, चुटकला, नाटक, भजन, धमाल, गीत, पाहूळी, सेखावाटी को इतियास, कथा अर कोई जीवनी आ सगळा कै बारे म कोई बी लिखेडी पोथी होवै तो थहे म्हानै द्यो जिसूं म्हे थहारी फोटू कै सागै थहारो सगळो ठोर-ठिकाणो अर नांव बी छापांगा जिसूं आपणी बोली नै बढावो मिलैगो।

ई क्ले थहारा लोगां सूं बिनती है कि आपणी बोली कै मांय ई काम नै बढाबा म थहे म्हारी मदत करो। थहारो पधारणो अर लिखेडो लेख सदा ई सुआगत कै काबिल रहगो।

**ठिकाणो**

**निरमाण सोसायटी**

**म्होल्लो आथूणो, खतरी कलोनी, वारड नमर 6,**

**नोलगड, झुंझनू, राजस्तान, पिन कोड - 333042**

**फोन नमर - 01594-223776**

**Email- [rajasthanlanguages@nirmaan.org.in](mailto:rajasthanlanguages@nirmaan.org.in)**

**Web- [www.nirmaan.org.in](http://www.nirmaan.org.in)**